

La FMR tscherna a David Truttmann sco schefredactor

Il collavuratur versà dal cader dad RTR surpiglia la direcziun da la redacziun FMR

■ (cp) David Truttmann, oriund da la Val Müstair, surpiglia sco emprim schefredactor la direcziun da la redacziun da la Fundaziun Medias Rumantschas (FMR). Quella è vegnida stgaffida or da l'antieriura Agentura da novitads rumantscha ANR. La FMR vegn a producir cuntegns per las medias rumantschas en il rom d'ina collavuraziun cun chasas da medias publicas e privatas cun caracter da pionier per tut la Svizra. Il cussegl da fundaziun da la Fundaziun Medias Rumantschas (FMR) ha elegi durant sia emprima sesida furmala quest mardi David Truttman sco emprim schefredactor da la nova redacziun da la FMR. Truttmann ha lavurà ils ultims 15 onns en diversas funcziuns per RTR, l'ultim sco co-mander da la partiziun «Reflexiun». Sco suppleant dal schefredactor dad RTR ha el manà dal 2012 al 2014 il ressort quotidian ch'è responsabel per l'entir program dal di da radio, televisiun ed online. En questa funcziun ha el manà 40 collavuraturas e collavuratur. Avant è il schurnalist da 44 onns stà collavuratur en la redacziun da «La Quotidiana» che vegn edida da Samedia. Truttmann ha absolvì il seminari da magisters a Cuir ed ha studegià istorgia generala e linguistica e litteratura rumantscha a l'Universitad da Turtig.

Incumbensa e sfida

«Jau ma legr fitg sin questa nova incumbensa e sin la sfida interessanta da pudair sviluppar vinavant ensem cun mias collegas e mes collegas da la redacziun FMR e cun ils partenaris da chasas da medias privatas e publicas la purschida da medias rumantschas», commentescha David Truttmann sia elecziun. El è maridà ed ha dus uffants. Igl è previs ch'el en-



La presidenta dal cussegl da fundaziun da la FMR Corina Casanova ensem cun schefredactor David Truttmann.

MAD

tra en ses nov uffizi en il decurs da l'atun 2019. La nova structura redacziunala duai entrar en vigur l'entschatta dal 2020.

Cun l'elecziun d'in schefredactor ha il project «Medias Rumantschas 19», sviluppa principalmain da la Lia Rumantscha, fatg in pass impurtant vers sia realisaziun. Gia dapi la mitad fanadur è en funcziun il cussegl da fundaziun che sa cumpona da personalitads versadas cun

tematicas rumantschas e che vegn presidià da l'antieriura chanceliera federala Corina Casanova. Ella commentescha: «Da cultivar e promover la purschida mediana è fitg impurtant per il rumantsch. Il cussegl da fundaziun è perquai fitg cuntent d'avair pudì recrutar sco schefredactor da la redacziun FMR cun sar Truttmann in schurnalist innovativ che ha ina gronda experientscha e ch'enconuscha

fitg bain las realitads rumantschas. El ha ina stretga relaziun cun tuttas regiuns rumantschas e cun la diaspora rumantscha.»

Cuntegns schurnalistics

L'incumbensa principala da la FMR è da metter a disposiziun sco redacziun cuntegns schurnalistics sco texts, fotografias e documentaziuns multimedias da bu-

na qualitad en tut ils tschintg idioms ed en rumantsch grischun per las medias rumantschas. Questa purschida vegn cumpletta cun cuntegns en rumantsch grischun liads a novitads che vegnan furnids dad RTR. Uschia vegn l'emprima giada en Svizra stabilida ina cooperaziun tranter medias publicas e privatas er per tutgant la lavur redacziunala. Il princip è che tut ils partenaris che han sutscrit ina cunvegna cun la FMR pon duvrar questa purschida e quests cuntegns senza custs e restricziuns per lur products ed en il rom da las disposiziuns concessionalas (per RTR). Sco recumpensa s'impegnan ils partenaris da realisar prestaziuns editorialas sco per exempel la stampa, la distribuziun e la vendita d'ina gasetta.

Garantir gasettas rumantschas

Uschia duai vegnir garantì per l'ina che las trais gasettas rumantschas existentas, «La Quotidiana» (Somedia Press AG), la «Posta Ladina» (Gammeter Media AG) e la «Pagina da Surmeir» (Uniun Rumantscha da Surmeir), possian exister vinavant. Ellas èn particularmain sut pressiu cunquai ch'ellas lavuran en in martgà extrem pitschen e fragmentà linguistica-main, quai che munta lavur e custs supplementars per lur producciun. Per l'otra permetta ina collavuraziun pli stretga tranter ils partenaris da sviluppar en il futur novas purschidas e products medials innovativs per la cuminanza rumantscha.

Sco fin ussa per la ANR dovri er en futur per la FMR ina finanziaziun publica tras la confederaziun ed il chantun. Entant che l'uffizi federal da cultura ha gia confirmà ses sustegn vegnan la regenza ed il Cussegl grond dal chantun Grischun a tractar la dumonda en il rom da la debatta budgetara quest atun.